



中國大事記

民國四年十一月十八日

●內務農商財政部暨蒙藏院呈准禁止私放蒙荒通則……財政部前因蒙旗私放荒地糾葛。曾電東三省及各特別區域。將防範懲治辦法。妥擬專章送部彙核。現各省已擬具此項專章。陸續咨送到部。經財政部會同內務農商部蒙藏院詳加覆核。擬定禁止私放蒙荒通則七條。呈奉大總統批准。(通則見法令門)

同 二十日

●特任龍建章為貴州巡按使……原任戴戡開缺。

●任命潘矩楹為綏遠都統

同 二十一日

●江西萬載縣人民搗毀縣署……萬載縣人民因該縣辦理烟酒公賣事。過於操切。致起騷動。聚眾將縣署搗毀。旋由警察到場彈壓。始就平靜。

30139 ●外蒙古派恰克圖交涉員……外蒙古活佛。以恰克圖地方。係



俄蒙毗連之處。中國已派有交涉官員駐紮該處。蒙古亦應派熟悉中俄情形之蒙員。辦理各項交涉事件。特選派綽克陀齊拉王為恰克圖交涉員。以便遇有交涉事故。就近向華俄官員接洽辦理。不必先行報告庫倫。

同 二十二日

●天津地震……天津大舉莊等二十餘村。於本日地震。約歷三秒餘鐘。

同 二十二日

●中俄又起外蒙古交涉……外蒙庫倫。博克多汗哲布尊丹巴呼圖克圖。近有不受冊封。並提出違約各問題情事。現由外交部向駐京俄公使提出交涉。並派員前往庫倫與都護使會商交涉辦法。

同 二十四日

●奉天巡按使張元奇開缺

同 二十五日

30140

●雲南石屏縣民反抗割烟……雲南石屏縣鄉民。向以栽種鴉片爲業。近來烟禁嚴厲。尙復私種。官吏下鄉剷除。鄉民竟聚衆反抗。並與官軍對敵。現擬添派軍隊往剿。

同 二十六日

●內務陸軍部蒙藏院呈准蒙人甄試章程：蒙人服官內地辦法。前經內務部會同陸軍部蒙藏院呈准辦理。茲又擬定蒙人甄試章程七條。呈請大總統批准。（章程見法令門）

十二月 一日

●財政部呈准取銷華新紡織有限公司免稅……華新紡織有限公司。前請將機器物料進口及轉運棉花原料免徵釐稅。由財政部呈奉大總統批准。現復由創辦人馬許等稟請督辦華新紡織有限公司事宜周學輝轉咨財政部。取銷免稅。經部呈請大總統批准。

●多倫鎮守使勦辦蒙匪……外蒙游格吉喇喇嘛汗拉丹什。爲巴布扎布之統帥。指示巴布扎布率匪搶掠內蒙東西法齊特各地。並勾通熱奉黑吉等處匪首。同謀搆亂。迭經政府電令外蒙自治官府查禁無效。近該喇嘛汗等。又籌備軍械。招募匪徒。將襲擊林西多倫等處。經多倫鎮守使探悉率軍前往勦辦。當將喇嘛汗拘獲。並搜出謀亂證據。其巴布扎布。已被逃逸。旋庫倫政府及駐庫俄國領事。以此舉爲侵越外蒙邊境。向政府提出交涉。

●吉長鐵路移交日人管理……中日新約。載明吉長鐵路管理權。由中國讓與日本。外交部已飭該路管理局於本日移交日本。

同 二日

●中巴修改條約簽字……我國前與巴西商議修改條約。現已簽字互換。其內容如下。（一）兩國人民皆可僑居。須由本人自願。均照最優國相待。（二）互派使臣。（三）設領事官。須駐紮國批准文憑。方能視事。（四）兩國人民。彼此持照遊歷內地。巴人須由關道給照。（五）兩國人民。准在兩國通商口岸運貨貿易。須有互相報酬專章。方能同沾優待利益。（六）兩國通商。照各國章程辦理。（七）商船優待。（八）不准販賣洋藥。（九）華民犯事。在行棧商船傭工。由中國官役巡傳拘傳。但須先知照領事或駐在地之巴西官吏。（十）兩國人民互控條例。另行規定。

同 三日

●任命程克爲副都統充阿爾泰辦事長官

●申令懲戒前吉林巡按使孟憲彝……令曰。前據肅政史傅增湘夏壽康呈劾前吉林巡按使孟憲彝各款。當經諭令朱慶瀾嚴密查辦外。茲據覆呈。原劾罔利營私。尙無實據。惟賭博挾妓。誠不免偶失檢點等語。官吏不得狎妓聚賭。定有條文。前頒四誠。嚴禁嬉游。孟憲彝躬任封圻。有表率羣僚之責。乃竟不知悔改。實屬有玷官箴。着付文官高等懲戒委員會依法懲戒。以儆效尤。餘如所擬辦理。此令。

●參謀陸海軍部呈准陸海軍軍職任用暫行規則……參謀陸海軍部。因陸海軍軍職任用。未便適用文職任用之規定。特擬訂陸海軍軍職任用暫行規則十一條。呈經大總統批准。（規則見法令門）

同日 五日

●申令處分京漢鐵路局參案……令曰。前據肅政史糾彈京漢鐵路局一案。經特派王瑚等調查報告。先後交平政院依法審理。茲據呈稱訊明裁決。該路局長關廣麟。於路員舞弊營私各節。偏聽失察。站長唐士濂。引用私人。不加約束。醫院院長湯富禮。辦理醫院。虛糜路款。均着付文官高等懲戒委員會依法懲戒。車務總管唐士清。雖無侵蝕公款實據。惟於包運貨物。率與商人訂立合同。致路局間受損失。顯係蠹國自私。着即先行褫職。與受賄有據之車站司磅梁士森。一併提交法庭審判。葉恭綽林振耀牽涉情節。既查無實據。均免于置議。同與公司夾帶私貨。妨害路務。原訂合同。着即取銷。餘均如擬責成交通部分別從嚴查辦。以清積弊。并交司法部查照。此令。

●上海製造局被黨人攻襲……上海革命黨人。聯絡海軍學生陳可鈞等。於本日晚間奪獲肇和兵艦。駕艦駛入浦江。發砲攻擊製造局。經陸上發砲回擊。並由各艦合圍砲攻。當將肇和艦擊傷。並擊斃多人。黨人遂棄艦而遁。嗣復攻襲第二區警署。亦被擊散。

同日 七日

●申令撤銷督辦濮陽黃河決口堵築事宜差……令曰。據督辦濮陽黃河決口堵築事宜徐世光。會同直隸河南山東三省巡按使。呈報濮陽習城集漫口合龍日期。並繪具工程全圖。臚陳辦理情形。請將在事出力員弁擇尤獎敘以昭激勸等語。習城集河工。前因

雨水陡漲。衝刷新隄。當經責成徐世光督同在工員弁相度籌防。竭力堵築。以免泛溢。茲據呈報合龍。辦理尙爲迅速。徐世光着即銷去記過處分。新任直隸大名道道尹姚聯奎。調任陝西榆林道道尹何炳庠。山東任用縣知事吳建勳。均着銷去褫職留任留工各處分。其餘文武各員。均准如所請給獎交政事堂暨內務部陸軍部分別呈辦。該處河工善後事宜。應責成直隸巡按使派員接收辦理。濮工督辦一差。即行撤銷。並由內務部分行山東河南巡按使查照。此令。

同日 八日

●申令處分鹽務署長張弧被劾案……令曰。前據周學熙呈稱鹽務署長張弧。措置乖謬。當予免職。以原官發往四川交巡按使差遣。旋據肅政史方貞等呈劾該員贓款甚鉅。復派章宗祥周學熙嚴密查辦。茲據查明覆稱。原劾各節。或傳聞有誤。或案贖無徵。惟因措置失宜。致滋疑議。至賄託情事。尙無確實證據等語。張弧既據呈稱查無實據。着仍遵前令赴川。以策後效。此令。

同日 十一日

●代行立法院彙查國民代表決定國體票數咨陳政府并推戴大總統爲皇帝……代行立法院前據國民請願改變國體。議定由國民代表大會解決。近日先後接准各省區國民代表大會文電報送決定國體票數。并公同委託該院爲國民代表大會總代表。經該院於本日開會。彙查全國國民代表共一千九百九十三人。得主張

30142 君主立憲票一千九百九十三張。並接准各省區國民代表大會文電。一致推戴今大總統爲皇帝。當據情咨行大總統。並謂全國民意。業經決定君主立憲國體。所有民國各法令。除與國體

牴觸不適用各條款外。仍應存其效力。帝室典章。歷代均有通例。其選舉大總統法。當然廢止。茲將國民代表大會決定國體票數彙開總單。又國民代表大會總代表推戴書。及各省區國民代表推戴書。又各界推戴文電。附咨齎送。應請查照施行等因。當奉大總統申令。查約法內載。民國之主權。本於國民之全體。既經國民代表大會全體表決改用君主立憲。本大總統自無討論之餘地。惟推戴一舉。無任惶駭。天生民而立之君。天命不易。惟有豐功盛德者始足以居之。本大總統從政。垂三十年。迭經事變。初無建樹。改造民國。已歷四稔。憂患紛乘。愆尤叢集。救過不贖。圖治未遑。豈有功業。足以稱述。前此隱跡滄海上。本已無志問世。遭遇時變。謬爲衆論所推。不得不勉出維持。捨身救國。然辛亥之冬。曾居政要。上無裨於國計。下無濟於民生。追懷故君。已多慚疚。今若驟躋大位。於心何安。此於道德不能無慚者也。致治保邦。首重大信。民國初建。本大總統曾向參議院宣誓。願竭能力。發揚共和。今若帝制自爲。則是背棄誓詞。此於信義無可自解者也。本大總統於正式被舉就職時。固嘗掬誠宣言。此心但知救國救民。成敗利鈍不敢知。勞逸毀譽不敢計。是本大總統既以救國救民爲重。固不惜犧牲一切以赴之。但自問功業既未足言。而關於道德信義諸大端。

又何可付之不顧。在愛我之國民代表。常亦不忍強我以所難也。尙望國民代表大會總代表等。熟籌審慮。另行推戴。以固國基。本大總統處此時期。仍以原有之名義。及現行之各職權。維持全國之現狀。除咨復代行立法院並將國民代表大會總代表推戴書及各省區國民代表推戴書件等送還代行立法院外。合行宣示。俾衆周知。此令。

同 十二日

●宣示代行立法院第二次推戴書并令各部院會同籌備一切事務……大總統申令。據全國國民代表大會總代表代行立法院奏稱。竊總代表前以衆論僉同。合詞勸進。籲請早登大寶。奉諭推戴一舉無任惶駭等因。仰見盛德淵衷。巍巍無與之至意。欽仰莫名。惟當此國情萬急之秋。人民歸嚮之誠。既已至湧沸騰。不可抑遏。我皇帝儼仍固執謙退。辭而不居。全國生民。實有若墜深淵之懼。蓋大位久懸。則萬幾叢勝。豈宜拘牽小節。致國本於岌岌。且明諭以爲天生民而立之君。惟有功德者足以居之。而自謂功業道德信義諸端。皆有問心未安之處。此則我皇帝之虛懷若谷。而不自知其攝冲逾量者也。總代表具有耳目。敢昧識知。請先就功烈言之。當有清之末造。武備廢弛。師徒糜爛。國威之不振久矣。我皇帝創練陸軍。一授以文明國最精之兵法。剷除宿弊。壁壘一新。手訂教條。洪纖畢備。募材選俊。紀律嚴明。魁奇傑特之才。多出於部下。不數年遂布滿寰區。成效大彰。聲威丕著。當時外人之蒞觀者。莫不嘖嘖稱歎。而全國

陸軍之制。由此權輿。厥後戡定四方。屢平大難。實利賴之。此功在經武者一也。及巡撫山東。值拳匪煽亂。聯軍內侵。乘輿播遷。大局糜爛。惟我皇帝坐鎮中原。屹若長城之獨峙。亂匪爲之懾伏。客兵相戒不犯。東南半壁。賴以保障。以一省之治安。砥柱中流。故雖首都淪陷。海宇騷然。卒得轉危爲安。

金甌無缺。當斯時。構難雖由亂民。而縱惡實由親貴。不懲禍始。無從媾和。強鄰有壓境之師。客軍無返旆之日。瓜分豆剖。禍迫眉睫。而元惡當國。莫敢發言。我皇帝密上彈章。請誅首

罪。頑凶伏法。中外翕然。和局始克告成。河山得免分裂。此功在匡國者二也。尋授任北洋大臣。其時風鶴猶驚。人心未靖。乃掃蕩會匪。崔符絕迹。廓清積案。民教相安。收京津於浩劫

之餘。返變輿於故宮之內。遂復高掌遠矚。厲行文明諸新政。無不體大思精。兼營并舉。規模式廓。氣象萬千。論者謂我皇

帝爲中國進化之先河。文明之淵海。符符事實。非等虛詞。此功在開化者三也。革命事起。風潮劇烈。不數月間。四方瓦解。

王室動搖。天意厭清。人心思亂。清孝定景皇后。知大勢之已去。滿族之孤危。痛哭臨朝。幾不知稅駕之何所。斯時我皇帝

即改玉改步。爲應天順人之舉。躬自踐阼。以安四海。夫誰得而議之者。乃猶恪恭臣節。艱難支柱。委曲維持。以一身當大

難之衝。幾遭炸彈而不恤。孝定景皇后。乃舉組織共和政府之

全權。與夫保全皇室之微意。悉契而付託我皇帝。始有南北議和優待皇室之條件。人知清廷遜位之易。結局之良。而不知我

皇帝之苦心調劑。固幾竭其旋乾轉坤之力也。於是南北復歸於統一。清室獲保其安全。四萬萬之生靈。弗陷於塗炭。二萬里之疆圉。得完其版圖。於風雨漂搖之中。而鎮懾奠安。卒成此共和四年之政局。國家得與人民休養生息。不至淪胥以盡。此功在靖難者四也。

中略

神州重奠。戈甲載戩。卒使閭閻安堵。區宇救寧。以臻此雍洽和熙之治。蓋自庚子拳匪之亂。辛亥革命之變。癸丑六省之擾。皆足以傾覆我中國。非我皇帝。孰能保持鎮撫。使我四千年神明之裔。食息茲土。不致淪亡。此則我皇帝之大有造於我中國。而我蒸黎子姓所共感而永矢弗諼也。此功在定亂者五也。不但此也。溯自通海以來。外交之失策。不可勝計。國際之聲譽。幾無可言。以積弱衰疲之國。孤立於羣雄角逐之間。託勢之危。莫此爲甚。而意外變局。又往往無先例之可援。措注偶一失宜。後患輒不堪設想。惟我皇帝。睿智淵深。英謀靈奮。遇有困難之交涉。一運以精密之謨猷。靡不立解糾紛。排除障礙。卒得有從容轉圜之餘地。而遠人之服膺威望。欽遲風采者。亦莫不輸誠結納。帖然交驩。弭禍變於樽俎之間。締盟好於敦槃之際。

此功在交鄰者六也。凡此六者。皆國家命脈之所存。萬姓安危之所繫。若乃其餘政教之殷繁。悉由宵旰勤勞之指導。則雖更僕數之。有不能盡。我皇帝之功烈。所以邁越百王也。請再就德行言之。我皇帝神功所推暨。何莫非盛德所滂流。蕩蕩巍巍。原無二致。至於一身行誼。則矩動天隨。亦有非淺識所能測者。卽如今茲創業。踵迹先朝。不無更姓改物之嫌。似有新舊乘除之感。明諭引此以爲慚德。尤見我皇帝慈祥忠厚之深衷。而不自覺其慮之過也。夫廿載以來。往事歷歷可徵。我皇帝之盡瘁先朝。其於臣節。可謂至矣。無如清政不綱。晚季尤多啓亂。庚子之難。一二童騃。召侮啓戎。成千古未有之笑柄。覆宗滅祀。指顧可期。非賴我皇帝障蔽狂流。逆挽滔天之禍。則清社之屋。早在斯時。迨我皇帝位望益隆。所以爲清室策治安者。益忠且摯。患滿族之孱弱也。則首練旗兵。患貴胄之闇昧也。則請遣遊歷。患秕政之撻擾也。則釐定官制。患舊俗之錮蔽也。則議立憲章。凡茲空前之偉畫。壹皆謀國之良圖。乃元輔見疏。忠讜不用。宗支干政。橫攬大權。躡貨玩戎。斲喪元氣。自皇帝退休三載。而朝局益不可爲矣。及武昌難作。被命於倉皇之際。受任於危亂之秋。猶殷殷以扶持衰祚爲念。詎意財力殫耗。叛亂紛乘。兵械兩竭於供。海陸盡失其險。都城以外。烽燧時驚。蒙藏邊藩。相繼告警。而十九條宣誓之文。已自將君上之大權。盡行摧剝而不顧。誰實爲之。固非我皇帝所及料也。後雖入居內閣。而禍深患迫。已有岌岌莫保之虞。老成憂國之衷。

至於廢寢忘餐。拊膺流涕。然而戰守俱困。險象環伏。卒苦於挽救之無術。向使沖人嗣統之初。不爲讒言所入。舉國政綱綱之大。一委諸元老之經營。將見綱舉目張。百廢具振。治平有象。亂萌不生。又何至有辛亥之事哉。至萬不得已。僅以特別條件。保其宗支陵寢於祚命已墜之餘。此中蓋有天命。非人力所能施。而我皇帝之所爲極意綢繆者。其始終對於清廷。洵屬仁至而義盡矣。若夫曆數遷移。非關人事。曩則清室墜於大勢。推其政權於民國。今則國民出於公意。戴我神聖之新君。時代兩更。星霜四易。愛新覺羅之政權早失。自無故宮禾黍之悲。中華帝國之首出有人。復視漢官威儀之盛。廢興各有其運。絕續并不相蒙。况有虞賓恩禮之隆。彌見與朝覆育之量。千古鼎革之際。未有如是之光明正大者。而我皇帝尙兢兢以慚德爲言。其實文王之三分事殷。亦無以加此。而成湯之恐貽口實。固遠不逮茲。此我皇帝之德行。所以爲亶絕古初也。然則明諭所謂無功薄德云云。誠爲謙抑之過言。而究未可以遏抑人民之殷望也。至於前此之宣誓。有發揚共和之願言。此特民國元首循例之詞。僅屬當時就職儀文之一。蓋當日之誓詞。根於元首之地位。而元首之地位。根於民國之國體。國體實定於國民之意嚮。元首當視乎民意爲從違。民意共和。則誓詞隨國體爲有效。民意君憲。則誓詞亦隨國體爲變遷。今日者國民厭棄共和。趨嚮君憲。則是民意已改。國體已變。民國元首之地位。已不復保存。民國元首之誓詞。當然消滅。凡此皆國民之所自爲。

固於皇帝渺不相涉者也。我皇帝惟知以國家爲前提。以民意爲準的。初無趨避之成見。有何嫌疑之可言。而奚必倖倖然守儀文之信誓也哉。要之我皇帝功崇德茂。威信素孚。中國一人。責無旁貸。昊蒼眷佑。億兆歸心。天命不可以久稽。人民不可以無主。伏冀搗衷勉抑。淵鑒早回。毋循禮讓之虛儀。久曠上天之寶命。亟頒俞詔。宣示天下。正位登極。以慰薄海臣民嗚呼之渴望。以鞏固我中華帝國萬年有道不丕之鴻基。總代表不勝歡欣鼓舞懇款迫切之至。除將明令發還本國民代表大會總代表推戴書及各省區國民代表推戴書等件仍行齎呈外。謹具摺上陳。伏乞睿鑒施行等情。據此。天下興亡。匹夫有責。予之愛國。詎在人後。但億兆推戴。責任重大。應如何厚利民生。應如何振興國勢。應如何刷新政治。躋進文明。種種措置。豈予薄德鮮能。所克負荷。前次掬誠陳述。本非故爲謙讓。實因惴惴交縈。有不能自己者也。乃國民責備愈嚴。期望愈切。竟使予無以自解。並無可諉避。第創造弘基。事體繁重。洵不可急遽舉行。致涉疏率。應飭各部院就本管事務會同詳細籌備。一俟籌備完竣。再行呈請施行。凡我國民。各宜安心營業。共謀利福。切勿再存疑慮。妨阻職務。各文武官吏。尤當靖共爾位。力保治安。用副本大總統軫念民生之至意。除將國民代表大會總代表推戴書及各省區國民代表推戴書發交政事堂并咨復全國國民代表大會總代表代行立法院外。合行宣示。俾衆周知。此令。

30145

同 十三日

●駐京日使因我國改建帝國照會外交部……駐京日本公使日置益。因我國改建帝國。於本日至外交部面遞日本政府公文。要求我國政府至十五日爲誠意滿足之答復。當由外交部於十六日送答復書於日本使署。略謂中國政府今次改建帝國。爲全國國民一致之主張。政府爲俯順輿論起見。自應照辦。所有種種關係。前已一再剖釋。至對於隱患禍亂。政府自有力維持。不使其發生云。

同 十四日

●申令參政院推薦憲法起草人員……令曰。全國人民。現經決定君主立憲。則制定憲法。自應從速進行。以慰人民之殷望。著參政院即行推薦通達憲法人員。呈請核奪。以便由該員迅即討論起草。至制定憲法之程序。應如何辦理。方臻妥速。用特諮詢參政院。尙其斟酌盡善。審議以聞。此令。

●公布商會法……參政院議決案。法見法令門。

同 十五日

●册封黎元洪爲武義親王……大總統策令光復華夏。肇始武昌。追溯締造之基。實賴山林之啓。所有辛亥首事立功人員。勳業偉大。及今彌彰。凡夙昔酬庸之典。允宜加隆。上將黎元洪。建節上游。號召東南。拱護中央。堅苦卓絕。力保大局。百折不回。癸丑贛寧之亂。督師防剿。厥功尤偉。照約法第二十七條。特沛榮施。以昭勳烈。黎元洪著册封武義親王。帶礪山河。

與同休戚。榮名茂典。王其敬承。此令。

●申令處分肇和兵艦暴動事……令曰。前據松滬護軍使楊善德海軍總司令李鼎新等先後電稱。本月五日晚。上海有革黨數十人。伺星期放假之時。由租界乘小輪冒登肇和練艦。搶劫開砲。當經同泊之應瑞海琛各艦及陸軍砲隊兜擊。革黨逃竄。肇和旋即收回。嗣又由租界發出革黨。向第一區警署攻擾。經軍警立行擊散。陸續擊獲革黨多人。分別訊辦各等情。上海為通商巨埠。中外商業。關係重大。革黨匿跡我法權不及之地。乘隙滋擾。殊足妨害公共之治安及商業之發達。著外交部飭令上海特派交涉員。會商駐埠各領事。妥籌防範辦法。以保公安。當亂黨劫艦之時。該艦長黃鳴球。未經在船。逾日始回。實屬異常荒謬。著即褫職奪官。交海軍部從嚴查辦。總司令李鼎新。練習艦隊司令徐振鵬。督率無方。軍紀廢弛。已交部分別議處。護軍使楊善德。定亂迅速。著有勳勞。著晉授勳二位。其餘出力陸海軍官弁。由楊善德李鼎新查明。擇尤請獎。以資鼓勵。仍督飭陸海軍兵認真防備。毋稍疏虞。此令。

●教育財政部呈准勸學所規程……規程見法令門。

●駐京外使向外交部聲明對於我國改革之態度……駐京日英俄法義五國公使。於本日同至外交部稱。前者中國政府允將恢復帝制暫行緩辦。並聲明擔任維持秩序。至將來形勢如何轉移。各國政府仍持靜觀態度。又聲明各國決無干涉中國獨立及主權之意。

●東三省賓縣等屬反抗清丈……東三省各縣近日舉辦清丈。賓縣阿城榆城等縣。均各聚眾反抗。當道擬派兵鎮壓。

同 十六日

●申令清室優待條件永不變更……令曰。政事堂呈稱。准參政院代行立法院咨准清室內務府咨稱。本日欽奉上諭。前於辛亥年十二月欽承孝定景皇后懿旨。委託今大總統以全權。組織共和政府。旋由國民推舉今大總統臨御統治。民國遂以成立。乃試行四年。不適國情。長此不改。後患愈烈。因此代行立法院據國民請願改革國體議決國民代表大會法案公布。現由全國國民代表決定君主立憲國體。並推戴今大總統為中華帝國大皇帝。為除舊更新之計。作長久治安之謀。凡我皇室極表贊成等語。現在國體業經人民決定君主立憲。所有清室優待條件。載在約法。永不變更。將來制定憲法時。自應附列憲法。繼續有效。此令。

●申令迅速籌備立法院議員選舉事宜……令曰。此次國民代表大會總代表。既決定國體為君主立憲。查立憲要義。首在有民選之立法機關。從前參眾兩院。因選舉法規之不良。致議員品類之糅雜。既無裨於國是。甚且釀成亂階。約法會議。遂後懲前。始謀根本之改正。上年議定立法院組織及議員選舉各法。無非鑒於既往之流失。期能適合於國情。斟酌再三。折衷定制。業經依法公布。並飭設局籌備在案。前據該局呈報。各省各特別行政區域立法院初選調查。係與國民會議初選調查。兼營並

進。業已一律告竣。其餘依照法令應辦各項選舉事宜。亦正次第籌辦。立法院爲關係憲政重要機關。議員選舉。亟應積極進行。俾得早日成立。著籌備立法院事務局。會同各該選舉監督。將關於立法院議員選舉一應事宜。迅速籌辦。准於來年以內召集立法院。以期發皇憲政。該局該監督等。各有法定責任。務須仰體國家尊重民意之本旨。切實奉行。妥速將事。毋得遲誤。是爲至要。此令。

●特簡田中玉趙椿年赴各省考察釐稅……大總統申令。前清抽收釐金。本非良稅。原議海關加稅之後。卽實行裁釐。惟因各國商議加稅。尙難一致。不得不暫仍舊制。俾濟急需。然以各省徵收釐稅。弊端百出。屢經通令各省認真整頓。於任用釐稅人員。嚴加限制。遵照條例。隨時考核。乃近聞各省於釐金一項。仍未一律清釐。處處設卡。節節抽稅。密如蛛網。沿途留難。或局員任便離差。玩視公務。或司巡藉端敲詐。不守定章。卒之增益國家收入。數本無多。而影響於商務前途。爲害甚大。本大總統軫念商艱。疚心夙夜。除裁釐加稅辦法。已飭主管各機關妥議籌備外。茲特簡田中玉趙椿年馳赴各該省考察利弊。凡係無關緊要之釐卡。分別裁撤歸併。免致阻礙商務。虛糜公款。其經征員司。如有舞弊營私情事。著卽破除情面。從嚴究治。毋稍瞻徇。總期俟加稅議訂之後。裁釐便可實行。用副惠恤商民之意。此令。

30147

●申令定期舉行文官考試文官甄用……令曰。文官高等考試及

文官甄用各令。均經公布施行。文官考試。係以學術分科。文官甄用。係以經驗爲重。方今庶政進行。端資羣力。旁求俊乂。事非緩圖。茲定於明年六月舉行文官高等考試。於明年八月舉行文官甄用。凡有與文官考試之資格者。務須各就所學。爭自濯磨。俾得分途並進。以備國家器使之用。至文官甄用。依令係由保荐官保荐。該保薦官等務須善體國家求材若渴之心。各舉所知。無使野有遺賢。亦不得稍涉冒濫。總期登明選公。賢能輩出。以無負舉行考試甄用大典之至意。此令。

●派員督稽查文官考試任用事宜……大總統申令。用行政之得失。動繫國家治術之張弛。故爲政之要。首重得人。古未有人材輩出而事不舉。亦未有人材消乏而事能治者。前以振拔賢能。杜絕冗濫。制定文官考試文官甄用文職任用各令。凡登進之資格。任用之程序。各有一定範圍。以期整肅官常。用昭庶績。此項重要官規。實關國家治本。當此艱難締造之始。建設事業。何啻萬端。庶職百司。需材尤急。自應廣爲搜羅。以資任使。現在文職任用各項程序。已經依令分別施行。文官考試文官甄用各項。亦經定期舉辦。在主管各該官署。自應依照各令規定。妥速奉行。惟事屬創舉。恐不免因循苟且。致溢登進之途。抑且陽奉陰違。有乖激揚之義。亟應總覈名實。樹之風聲。茲特派汪大燮趙惟熙夏壽康王瑚。督催稽查。俾課吏求才諸大典。得以剋期進行。并不致滋生流弊。自此以後。關於考試任用各項官規。倘有任意延玩。奉行不力。或辦理不善者。

30148

由該督催稽查之員。隨時上開。即當分別重輕。付之懲戒。以示國家立賢無方之至意。此令。

●公布修正大總統府政事堂組織令第四條第五條……大總統修正公布。令見法令門。

同 十七日

●中日訂立四鄭鐵路借款條約……滿蒙五鐵路中四平街鄭家屯間一線。政府已定借日款建築。現與日本訂定借款條約二十六條。附約八條。本日由大總統批准簽字。其條款大略如下。(一)借款金額五百萬元。利息周年五釐。十年不動。歸還期四十年。(二)以鐵路全線計五十二英里及財產全部與收入為抵押。總工程師會計主任運轉主任。皆以日本人充之。(三)本合同簽字後。六個月內動工。限於二年以內竣工。

同 十八日

●特任馮國璋為參謀總長……未到任以前。由唐在禮代理。

●申令舊侶耆碩故人均勿稱臣……令曰。以予薄德。奚足君人。遭時多難。無從息肩。而臨深履薄。無時去懷。近見各處文電。紛紛稱臣。在人以為盡禮。在予實有難安。况今之文武要職。多予舊日之同僚。眷念故侶。情尤難堪。雖四岳五人。曾無異代之成見。而聖帝賢王。萬非予所可企及。凡我舊侶及耆碩故人。均弗稱臣。時艱方殷。要在協力謀國。無取儀文末節也。此令。

●申令滿蒙回藏待遇條件繼續有效……令曰。政事堂呈前據蒙

古西藏青海回部國民代表鑲黃旗滿洲都統親王那彥圖等呈稱。共和不適國情。全國同聲。咸以改定君憲為救國大計。現在國民代表大會滿蒙回藏國民代表。投票決定國體。一致主張君主立憲。具見薄海人民。心理大同。惟是國體既定為帝國。帝位必歸於聖人。四年以來。國家多故。拯民水火。登之衽席。我四萬萬蒸黎身家子姓。實託我大總統一人之覆庇。我國民為人謀長治久安之厚福。為國家圖創業垂統之宏規。億萬同心。歸於聖德。代表等謹以滿蒙回藏國民公意。恭戴我大總統為中華帝國皇帝。並以國家最上完全主權。奉之於皇帝。承天建極。傳之萬世。伏願順應天人。踐登大位。皇建有極。民悅無疆。一統定基。保四千年神明之胄。弈葉蒙福。遂億萬姓歸往之誠。代表等不勝歡欣鼓舞之至等情。現在國體業經全國國民代表大會總代表代行立法院決定君主立憲。所有滿蒙回藏待遇條件。載在約法。將來制定憲法時。自應一併列入憲法。繼續有效。此令。

同 十九日

●黎元洪辭武義親王封爵申令毋許回辭……黎元洪前奉策令封為武義親王。呈請辭封。奉申令前以武義親王黎元洪盛德昭彰。策勳封爵。式符名實。衆論翕然。乃王猶懷謙抑。懇切辭封。既見冲襟。益思往績。王當辛癸多事之秋。坐鎮鄂疆。功在全局。凡所建議。悉出真誠。謀國之忠。苦心無比。功懋懋賞。豈惟予一人之私。王其祇承前命。毋許回辭。此令。

●申令法制局修正法令……令曰。立憲國首重法治。所謂法治

者並非務爲空文。塗飾耳目。一法既立。期在必行。苟其未行。不如無法。治之大要。一在因民之利以適合國情。一在禁民爲非以矯正國俗。善制法者。詳究事勢。執簡馭繁。適能用法而神明於法。反是則法令滋多。不求實踐。積玩既久。綱紀蕩然。及其末流。徒爲胥吏舞文之具。以言法治。去之遠矣。近年制定法令。頗有未見施行者。推原其故。由於立法之始。或出諸理想而未嘗調查其實際。或泥於畫一而不知事變之無窮。以致可行之法。亦視爲具文。寔失效力。古人有言。奉法者強則國強。奉法者弱則國弱。可引以爲戒。著政事堂飭法制局將民國元年以來法令。分別存留廢止。悉心修正。呈請施行。各部院及各省區長官。遇法令中實有窒礙難行。亦可敘明理由。咨明政事堂發局彙核修改。其各部院各省區自訂規章。亦須刪繁就簡。總期慎始圖終。循名核實。行之以約。持之以恆。令全國人民。受治於法律之下。以人從法。不以法從人。庶幾政治更新。同遵正軌。予有厚望焉。此令。

30149
●申令定期舉行學績試驗……令曰。國家設官分職。用人之道。不能限於一途。故取士之方。卽不能專懸一格。在昔九品官人之法。十科舉士之議。立賢無方。具有深意。前於文官高等考試文官普通考試以外。復制定學績試驗條例。公布施行在案。條例主旨。係爲不能與高等考試與不能直接與普通考試之人。特設一進身之路。且由各省道就近分別考試。尤在全國普及。不使一地向隅。依照該條例考取之俊士選士。或得任地方掾屬。

或得與普通考試。既所以勵國民嚮學之志。亦所以儲國家治事之材。現在各地方行政官署遵照官制所用掾屬。爲數計已不少。而文官普通考試。依官規所定程序。亦應於文官高等考試後。同時舉行。此項學績試驗。自應先期舉辦。以爲地方掾屬及普通考試之預備。文官高等考試。昨已令定於明年六月舉行。則文官普通考試之期。應卽定在明年十二月以前。至學績試驗之道試及京兆屬縣試。應於明年五月以前舉行。省試及京兆熱河綏遠察哈爾等特別行政區域各試。應於明年九月以前舉行。其舉行試驗日期。由各該長官酌量地方情形。妥爲籌辦。仍著將擬定日期。隨時呈明辦理。事關獎勵學風。振飭吏術。自通令以後。各該主管官署。務各按照條例。切實奉行。以副國家殷殷求才之至意。此令。

同 二十日

●申令以徐世昌趙爾巽李經羲張謇爲嵩山四友……令曰。自古創業之主。類皆眷懷故舊。略分言情。布衣昆季之歎。太史客星之奏。流傳簡冊。異代同符。徐世昌趙爾巽李經羲張謇。皆以德行動猷。久負重望。在當代爲人倫之表。在藐躬爲道義之交。維高躅大年。不復勞以朝請。而國有大政。當就諮詢。既望敷陳。尤資責難。匡予不逮。卽所以保我黎民。元老壯猷。關係至大。茲特頒嵩山照影各一。名曰嵩山四友。用豎白首之盟。同寶墨華之壽。以尊國耆。其喻予懷。應如何優禮之處。並著政事堂具議以聞。此令。